

雙溪集附遺言

二





雙溪集

附道言

(一)

蘇籀撰

雙溪集卷第七

表

代廣東漕謝表

乘輅江右。深愧空餐。改轅嶠南。再蒙寵寄。諮諏原隰。焜耀嶺瀧。均王澤于敷天。冒海隅之出日。澄清任責。欣慨交并。中謝伏念臣。少學洙泗之濱。繆習六藝。老昧然桑之妙。豈悟九章。黽勉金穀之間。汨沒簿書之際。循良尚冀於前躅。空疎誤玷於顯曹。倚伏相乘。顛沛失據。弔影舐犢之戚。消冰晞驥之心。不欲抗顏於形勢之途。乃其私願。荐令悉力於均調之在。休有榮光。仰天造之曲成。顧人微而靡稱。此蓋伏遇皇帝陛下。至仁化育。神智裁成。耀德振兵。柔遠能邇。講修舊貫。初解瑟更張之時。允迪中興。有思馬斯藏之富。察臣懇惓。素守不移。憐臣踐揚。老當益壯。收東隅而已晚。付南紀則過優。思終始以酬恩。念綏柔于遐裔。殫竭計慮。理財正辭。撫循民夷。裕人約已。敦崇禮義。抑絕暴貪。愛惜禹陰。盡瘁公家之利。傾就堯日。無慙畿甸之官。臣無任。

婺州謝增秩表

調發佐軍。幸無闕失。褒賞增秩。叨被寵榮。揣已何功。汗顏無措。中謝伏念負乘致寇。伐鼓追逃。凡率土之王民。誅無禮於君者。奮龍輅之洪毅。致鼠竊之被擒。州縣運粟而濟師。戎行操袂而獻虜。辱在共理。例陟

華階愧無奇策與異能。亦錄微勞與片善。示大公之渥澤。用勸獎于多方。此蓋伏遇皇帝陛下。功德日新。智勇天錫。正位凝命。賞慶刑威。禁暴而生靈允懷。念功而吏士用命。豈特一方之咸乂。殆將縣宇以削平。臣敢不激昂犬馬之心。展盡驅馳之力。誓效頂踵。用副焦勞。臣無任。

福州問候表

臣某言。建炎三年十二月二十六日。有入內侍省東頭供奉官徐珣等。附海船至本州。伏聞大駕以十五日發自明州。及二十九日。被温州牒。備准劄子。聖旨。車駕權幸温州者。遵海而巡。蓋不獲已。避狄之患。厥惟艱哉。臣某誠惶誠恐。頓首頓首。應係官屬吏民等。不勝敵愾之心。各奮同仇之誓。王室之憂未弭。臣子之義不遑。竊惟本路八州。近寇諸隘。築堡立柵。募民爲兵。天成限隔之牢。地利金湯之固。長樂重鎮。行宮切鄰。悉力經營。祇備巡幸。臣聞通大道者。不失四國。克畏天者。必保萬邦。恭惟皇帝陛下。多得天人之信助。少寬宵旰之憂勤。念生靈之厭干戈。如飢渴之思飲食。熟講萬全之策。莫如五餌之優。更祈任賢使能。據險守要。致使兇渠效順。亂庶自消。專務智謀。徐圖興復。臣無任。

代建州上表

臣某言。准進奏院關報。大駕以二月十七日。權駐温州者。千艘攸濟。勤營衛於海隅。三捷奏功。朝衣冠于帝所。南牧之師悉遁。東巡之策最良。臣某誠惶誠恐。頓首頓首。伏以民之歸仁。猶水之就下。天之助順。如響之應聲。我師鷺鳥之匿形。虜騎長蛇之荐食。雖強弱之勢異。而曲直之理明。講論綏靖之圖。已見收復。

之續。臣新叨守土。久忝殊恩。願奔行宮。省視官具。招輯戰士。啓先戎行。內馳螻蟻之誠。豈勝雲日之望。伏惟皇帝陛下。寅畏天戒。懷柔物情。引咎責躬。訓詞惻怛。絕甘撫字。宵旰焦勞。豈圖一切之近功。方興萬世之長利。忍忿避狄。門智從戎。懷鶚鷗以好音。不惜皮幣。消稂沴爲和氣。益省征輸。庶幾多算之有成。以致羣兇之向化。二聖邁返。四境解嚴。憬彼鬼方。亦三年而能克。修我國政。無一日之苟安。經緯乾坤。盡納富壽。臣無任。

賀天申節表

至貴之符。於昭出震。中興之兆。不佑乘乾。恩霑動植。飛潛可謂至德。歷象星辰。日月期於無疆。於萬斯年。積億善頌。中賀伏惟皇帝陛下。天所瞻顧。民無能名。生而神靈。會于皇極。方且訪諮黃髮。賜靈壽而乞言。感致白環。摘蟠桃而屢獻。軼華助之壽考。過成康之措刑。臣拘係守符。阻慶班列。嚴恭寅畏。信乎享國之長。清靜存誠。茲乃攝生之固。何止上千秋之鑑。益誕敷五福之疇。臣無任。

代人謝放罷表

忝承朝命。祇解郡章。敷宥從輕。省躬兢惕。中謝伏念臣草芥微賤。天地生成。願盡忠誠。無忝器使。郡當孔道。實爲逋盜之奔趨。疊起鄰邦。責在守臣之捍禦。不能固護於封壤。何以撫循于吏民。敢避嚴科。幸蒙罷免。此蓋伏遇皇帝陛下。茂日新之盛德。恢天覆之兼容。厚生惟和。慎微接下。照臨幽枉。兼納賢愚。藏疾并容。矜愚不逮。臣仰荷仁政。俯念悔尤。靖言初終。亦非偶爾。向者兇黨方熾。州兵至微。驅烏合而待其衝。收

瓦解以仰其勢。屢獻俘馘。遂失枝梧。徒老弱于它山。濟府庫于別浦。賊無所得。民亦保全。論其衆寡之間。難遏奔衝之勢。彈章荐擊。吏議不輕。席藁何言。負芒不暇。誓當洗滌于塵垢。庶幾脫露于錐囊。稍贖愆愆。更圖績效。臣無任。

賀天申節表

聰明睿智。膺歷數以在躬。錫羨休嘉。標震誕之彌月。祥開是日。慶浹縣區。草木欣榮。華夷交慶。中賀恭惟皇帝陛下。德惟善政。道本生和。綏靖黎黔。躋風俗於富壽。寅畏天命。知稼穡之艱難。蓋舉二典以同符。豈但四人之迪哲。涇備員從橐。阻望階蓂。歌天保以酬恩。無疆惟福。同嵩呼而請祝。於萬斯年。均祐函生。永建皇極。臣無任。

代謝賜茶藥表

奉命登車。顧遵周道。使華按節。傳諭堯言。不遠威顏。竦慄矜眷。中謝伏念。臣瑣才無取。賦命數奇。矧經憂。喪之餘。驟領蕃宣之寄。體上醫之活國。念靈草之濟民。安危所關。錙銖責効。惟時故事。亦玷常科。罔間孤蹤。有茲好賜。珍奩品劑。焜耀室家。異數殊恩。歆豔朝野。此蓋伏遇皇帝陛下。使臣以禮。御世須才。有攘消疵癘之方。以聚蓄收採爲富。臣敢不推原斯意。勉盡其心。撫調發之瘡痍。雪鰥孤之困憊。芟夷寇亂。如決贅疣。崇獎忠嘉。若護元氣。思之熟矣。幸而得之。臣無任。

代謝馬表

思俞入覲。敢俟駕而後趨。寵數殊常。冒脫驂之蕃錫。輟從內廐。竦動私廷。鳳臆蘭筋。鏤錫金卮。榮逾三賜。禮異羣僚。揣稱自量。非據尤愧。中謝伏念臣誤塵人乏。晞驥周行。許國驅馳。逢辰亨奮。眷任增重。志願彌堅。將收其汗馬之勞。幸假以絕塵之乘。拂拭羈策。憤激胸膺。伏遇皇帝陛下。天施無私。綜覈名實。聖謨廣納。優待俊良。朽索常懷。長轡遠馭。神算非驚。拙所逮。微績當策勵而成。臣敢不強勉圖功。夙夜匪懈。老而知道。恐不繆于冥行。範以從禽。誓不爲于詭遇。臣無任。

代謝金帶表

一介孤愚。詎貪篋實之腆。重鑠焜耀。優寵身章之華。恩出非常。眷隆加等。中謝伏念臣早從韋布。中預摺紳。齷齪何功。安閑累歲。暫墊角巾于草野。豈圖端笏於鸞行。垂厲有餘。朽質無措。公西東立于賓客之右。綽有嘉言。安平橫驚于淄澠之間。懋建奇績。自惟小己。景慕前修。安得勞能。稱茲藩飾。伏遇皇帝陛下。知人能哲。陳錫載周。固結士心。不吝名器。示斷金之義。皆歸範鎔。誦錫朋之章。可謂樂育。漢庭盛賚。敢云稽古之功。孔里自言。誓竭爲邦之力。臣無任。

代起復殿藩謝表

小志懷私。懇畢祥琴之制。大恩荐被。稽違詔綽之行。終俾藩宣。弗忘器使。支離強起。俯僂冒膺。無任覲顏。莫迴渙汗。中謝伏念臣忠惟許國。義切愛君。不量邱壑之姿。自奮功名之會。及物祈于無負。憂人未能有爲。冕旒念于前勳。弓冶期於先訓。晝訪每蒙于嚮納。秋毫盡出于生成。不因先容。叨承遴選。歷職清貫。超

領宥樞道固無窮才實有限一簣爲山之始三人證虎而成負乘致譏內訟沒齒銷骨興謗無辯自明始終容慈委曲矜照茲者至公獨斷洪造惟新祕近華資班聯耆俊要衝鉅屏經制邊維楊拔矣而尋培車賃焉而復起伏遇皇帝陛下天臨日鑒地載海涵軫其簪履之遺束其幃幄之舊拂拭塵滓收錄桑榆臣方且攬轡之官戴星圖治撫循疲瘵調理戰耕念進思竭盡之心未輸梗概副宵旰憂勤之績不憚捐糜或允文陛之趨不爲便道之計誓驅馳之頂踵用推廣於詔條輓輶時宜韋絃家法臣無任

代辭免參政表

倚注之隆參貳宰事幾微所賴考慎民瞻顧非其才豈勝厥任再殫危款仰冀矜從中謝伏念臣卑棲何意于高翔短伎夙殫于已試委遠庶務幽憂累年整理衣冠寢成疎野賜承清問獲近天光擢任褒揚瀚洗傳致三接優寵九殞未酬雖宸衷訓之特殊而柄任知難而當止緣智力不可頓進而識局惟堪小知覬偶合于毫分恥循默而尸素方今內外修攘之際聖哲馳驚之秋副寤寐之焦勞必建明之幾警惟密勿任道之佐能毗益欲治之君譬如周王命樊尹以軍國內藉張仲之孝友故無妨功害能之姦唐皇任房杜以佐佑而又咨鄭公以獻納故有盡忠竭誠之益廁其盛選豈容常倫上累休明殆由鄙陋姑祈冗散豈敢過分而叨踰聊欲自安固當引避於隆顯伏惟皇帝陛下執利世磨鈍之器念因任責成之功使鳶魚自適于飛潛而棧楹各隨其鉅細宜寢渙命允協師言免貽覆餗之愆不溢挈壺之量遂其懇請乃劇知憐惟器所堪竭誠圖報臣無任

代謝許終制表

渙命奪情。頗緣金革之務。篤親違詔。固終直經之期。悚懼難任。繼蒙俞允。不愆素守。實自眷憐。中謝竊以公爾忘私。喪不貳事。慢令聽刑于司敗。慈顏欲報之終天。隕越不遑。進退維谷。臣世執矩範。家紹弓裘。德涼祚衰。創鉅疊積。餘生視息。粗知禮經。俎豆典墳。平昔聞見。既乏服戎角力之勇。又匪振兵捍敵之能。屏迹衡茅。方劬勞罔極之慕。忽分符竹。亦黽勉何辭而行。區區曾閔之懷。蕩蕩唐虞之化。恭惟孝治。無取從權。以蓼莪之思。忝行葦之施。此蓋伏遇皇帝陛下。深仁篤義。知遠察微。成就孤愚。保全出處。謂臣懇服名教。必移此於忠嘉。愍臣濫在搢紳。忍遽虧其志操。善厚風俗。冠絕古今。臣土木形骸。抱致君之深意。蓬蒿心目。誓許國於茲晨。庶幾微塵。稍增喬嶽。臣無任。

代慰國哀表

臣某言。伏觀今月二十五日聖旨。太上道君皇帝。厭世升遐。寧德皇后上仙者。訃自龍荒。哀恫中國。奉諱之始。號慕攸同。中慰恭惟太上道君皇帝。二紀憂勞。萬方亭育。遜位貶號。謙抑逾涯。未返常嶽之巡。遽陟鼎湖之駕。寧德皇后。表正坤位。贊祐宸居。從翠華而遠游。渡沙漠而不返。羣黎百姓。攀咽無窮。皇帝陛下。孝切羹牆。痛深屺岵。伏惟降抑哀慟。俯全禮經。臣無任瞻望隕越之至。

祝聖壽表

興王景貺。福生有基。享國昌期。道乃能久。里社鳴而紀節。嵩嶽呼而發祥。浹緜宇之歡心。同一詞而善頌。

中賀恭惟皇帝陛下。施由庚乎庶物。以無逸爲元龜。三靈協祐。以儲休九有。來同于富壽。方將舞干羽而渾文軌。頒正朔而服要荒。寢明寢昌。襲無疆之歷。時萬時億。降有永之年。臣阻扈和鑾。依戀行闕。華封獻頌。燭火太陽。小草何知。傾心委照。臣無任。

徽宗祔廟慰表

賓仙蹕於雲天。廓然遐陟。從祖禰於廟室。永言孝思。凡屬臣民。共增摧咽。中慰竊以飾終之容典。惟備追遠之想望。何勝。敍宗祧昭穆之彝倫。爲禰祠烝嘗而作主。所以達睿誠。欲報之德。係邦國哀恫之心。伏惟皇帝陛下。愛欽盡于篤親。慈芬昭于孝祀。致終天罔極之慕。安皇靈如在之神。存手澤以感音容。每齋戒而思居處。風木不靜。霜庭惻然。願抑至情。以幸天下。臣無任。

代駕幸臨安起居表二首

六龍順豫。旋軫勞歸。五玉駿奔。奉贄敢後。廓吾天步。匪惟建業之江山。俟我後來。延望武林之士庶。上宮闈之管鑰。返羽衛于穹廬。遐邇謳吟。人靈胥悅。中賀恭惟皇帝陛下。仁提三尺。道運六韜。御世冰淵。弗遑寧處。救民沸鼎。猶抑孝誠。吁。是焦勞。嚴恭寅畏。鬱鬱何心於居此。孜孜向善。以強爲念。邦家禍亂之秋。恢祖宗不顯之業。勤而不息。樂以忘疲。殆獲華夷之歸。必期河雒之復。臣屬嬰郡治。阻覲旄頭之塵。平定浚郊。卽建干旗之旆。臣無任。

又

戎輅西轅。六師節制。鸞旂返旆。萬寓駿奔。副吾王遊豫之謠。諧我后來蘇之願。豈但卻敵。凡以裕人。中賀恭惟皇帝陛下。稽虞周之有爲。恢祖宗之不業。班師旅而苗格。修德教而崇降。從善易于轉圜。應物明如觀火。決戎機于千里。拊幅員于一堂。使耄稚以懷安。顧江山之表裏。鳴蹕浙右。州縣無供億之勞。尺書浚都。胡虜必馴擾而臣服。周南跼跡。咫尺堯雲。闕下馳神。祇聆禹會。臣無任。

代謝青瑣表

西掖代言。已塵寵授。東省夕拜。荐陟榮途。辭爵靡遑。審躬無措。愧甚鵜梁之刺。未知簪臺之榮。中謝竊以掌百事之稽遲。司萬機之出納。審覆論駁之地。興衰得失之原。使還詔批敕。動獲所宜。則發號出令。罔有弗當。臣每侍法坐。親奉德音。慎選疇咨。殆求顯效。叨據要任。深恐妨賢。伏念臣志力尪孱。資地淺薄。偶時乘之初載。同品彙以偕升。閱十祀于清郎。玷階華顯。蒙三遷于法從。誓欲憂勤。方中興覈實之辰。斯羣士願才之日。而臣藝文骯髒。豈射父之作訓詞。經訓疎蕪。慙倚相之讀墳典。被摩鄙樸。奮勵論思。永惟復古之隆。精審適時之略。非敢後也。而才有限。豈曰能之。而願學焉。欽副使令。俯虞顛覆。屢上退閑之請。深慚覆幬之私。此蓋伏遇皇帝陛下。齊禹湯之勃興。體堯舜之極致。德智長而治道得。俊乂多而邦國寧。誠能輯羣策之良圖。必將致九有之咸乂。與進儒事。不遺一介之凡。激勵猷爲。益俾百工之起。臣雖愚懵。粗識廉隅。敢不靖共于朝。虔恪底績。乃心贊國。竭節忘身。餘生何力之纖微。畢命倘酬于萬一。臣無任。

代次公謝江東運判表

祇奉絲綸。載馳駟馭。巡行封略。覽視吏民。中謝伏以江左興王之上遊。淮壖聚兵之嚴警。逮間暇日。乃勵精秋。筦樞市關。弛張質化。舟楫廩庾。糾擿蠹欺。惟籌度罔失纖微。而意見務知遠大。乃振軍以固本。兼實邊而制戎。周爰諮謀。華彼原隰。豈期器使。誤及孤平。激昂衰蹤。負載山嶽。安有異術。裨益涓塵。希一得于百爲。求千里于十駕。虛荷委寄。實深震驚。此蓋伏遇皇帝陛下。勃然中興。奮乎有作。施博天地。仁察鳶魚。臨下易而有親。燭遠幽而必照。付外臺之耳目。邇行宮之要樞。以臣肅奉憲章。粗稔朝聽。施勞州縣。惻怛黎元。責效方來。普勸仕者。臣敢不每懷靡及。食糗飲冰。當官而行。疚心焦慮。六條漢詔。務叶公言。五術唐臣。專斬厚俗。殫鴛塞之微願。副驅策之殊恩。苟緩曠濫。寧辭頂踵。臣無任。

代謝禮部尙書表

王政所關。天臺治本。邦禮專掌。春官望穹。貳卿方愧于官箴。六長所資於民譽。冒塵予進。闕略曠濫。啓處莫遑。辭避罔獲。中謝竊以至孝睿明之主。議禮爲宜。興復迎奉之期。顯親篤志。由仁義而起。盡欽愛而行。近正長樂之隆名。祇嚴徽冊。發自清衷之誠悃。欽庀攸司。鐘鼓玉帛之設施。承稟諮諏之程度。綿力何有。綸言所嘉。謂蚤能戴于邱山。顧燭或裨于日月。忝竊論思之地。荐加龍擢之恩。此蓋伏遇皇帝陛下。吁晨勞謙。釋四海之鬱結。勵精覈實。致百度之咸熙。天縱聖神。生知儒學。方且投戈而息馬。不忘論道以橫經。被訪對于延英。屢奏篇于黼座。遭逢何啻於千載。鴻私殆歷於九遷。矧草木之枵蕪。當天地之渥澤。非德智學藝不足以膺東注。非公正節行不足以玷疇咨。瞻錄前修。褒美先緒。施及不肖。誤被超陞。位高深懼。

於疾顛。才小胡能于爲役。念喉舌之任。期吐茹之得。中居臺閣之間。循規矩而斯在。敢不靖其無懈。勉殫夙夜之勞。知無不爲。以答生成之造。激昂衰陋。曷憚捐糜。臣無任。

賀東朝歸表

格天德至。本自宸扆而刑多方。篤親誠純。不忘跬步而還萬里。奉寶輿之言返。舉連環而不渝。溢繇宇之歡心。巍高世之馴行。慈襟一喜。品彙咸蘇。中賀伏惟皇帝陛下。本曾閔。方寸之衷。體勳華。要廣之道。勵勤精力。吁祈請之艱難。菲薄吓宵。慕溫清于遐邇。方且顯鴻名而正統紀。曷嘗忘侍膳而捨寢門。未宜暢于鬱堙。久湛詳于宥密。致極兢兢而業業。允諸洩洩與融融。蓋人事之無虧。俾天心之保定。順承顏志。萬國悅而養東朝。溥博施恩。三表修而懷北顧。較勞考事。冠古超今。如漢薄之代來。厥功絕易。若鄭姜之穎出。其事罔倫。翕如覩大練之光。來歸著彤管之煒。臣等幸叨盛際。祇若徽音。坤載延鴻。殆年長於西母。皇枝繁衍。益天受於太任。臣無任。

賀元會表

伏以垂象施教。大一統於王正。凝冕當陽。舉盛儀于元朔。稽詳周典。採撫漢儒。夷夏來同。天人昭格。中賀伏惟皇帝陛下。體元正大。建極中興。曩者每多外禦之虞。是以未遑正宁之位。裁成補救。肇自睿圖。和洽光輝。允謂儒效。嚮明而治。謹始授時。設九賓之臚傳。受四海之圖籍。萬彙待發生之慶。十行布寬大之言。物備禮隆。發聲明于度數。化孚澤浹。正班爵而紀綱。臣夙濫寅行。坐廢外補。想簪紳之表著。望雲日以神

馳承明宣政之庭。固嘗俯伏衛室。合宮之事。殆無復過。嘉與蒼黔。同茲鼓舞。臣無任。

代賀親耕藉田表

省耕千畝之甸。親御三推之儀。斷揉斯勤。齊戒與祭。惻怛宸旨。溥率域中。榮觀日新。聖風雲靡。中賀竊以衣食王業之要。思文后稷之稱。皇極建而五福敷。烝人粒而萬邦乂。曩昔艱難之際。擾徙安業之農。故敦奉爲寰宇先。蓋未祈而造物相。會通典禮。底豫神祇。伏惟皇帝陛下。存信去兵。納民軌物。躬行舜禹之急務。力致宗廟之潔豐。興起彌文。篤纂前烈。誕降嘉種。至治馨香。如坻如京。以孝以享。近弼碩彥。調燮富民之封。列郡循良。申嚴力穡之課。戶戶樂生而勸善。人人舉趾而授時。天瑞地符。家給國阜。臣究宣德意。眇漢儀之六條。遵稟化原。邁唐賢之八計。萬耦于耜。九土載芟。偕生遯畔之心。咸革惰遊之末。臣無任。

慈寧慶八十賀表

母儀慈懿。帝孝遵承。慕華萼之色難。躬顯顯之愛立。協氣流乎闔壺。要道光于華夷。稽前古之姜任。繼今朝之高向。王化輔毗之變理。椒屋蘭閨。坤元博載以無疆。龍輿寶璽。於皇萬斯之紀。肇登八十之齡。三靈之溥命咸宜。九有之歡心一致。甲子環匝。幅員雍熙。中賀恭惟皇帝陛下。體古訓于韋編。運嘉猷于掌握。德之所覃者大。文之所加者深。宏休難罄於揄揚。盡美兼全于仁孝。臣螢蟻至眇。願增綴南陔雅章。紳笏合併。慶無量西竺遐壽。堯時舜旦。獸舞樵謳。臣無任。

擬本州守謝御製損齋刻表

義經與蹟。致用研幾。聖學高明。發揮睿藻。訓流金石。化育簪紳。叨被恩頒。虔遵模範。中賀竊以味典常于
大易。喻道真于元門。云乎損德之脩。亦曰儉我之寶。事人天蓋莫若嗇。去奢泰復返其根。陋哉往古之夸
毗。灼然持守之規戒。恭惟皇帝陛下。效天法地。盡性存誠。崇簡易而守成。端穆清而凝命。金甌全而邦基
固。玉衡正而泰階平。既道協于皇王。垂衣致理。則民敦于樸素。指掌何勞。臣謬推歸美之源。以補輯帷之
闕。傲謔欽詠。每字字以求思。韞櫝珍藏。但拳拳而弗置。臣無任。

雙溪集卷第八

書

上門下侍郎書

猶夙志于學。圭華之下。蓋嘗妄意計議。今古天下之事。恥爲空言。必致實效。以前輩爲之宗盟。如山如嶽。然當世富貴功名之士。所欲見者無幾。竊伏閣下之義。不敢近捨而遠希。因具道其區區焉。語曰。時然後言。人不厭其言。古者有大事。闔國人而問。謀及庶人。今日誠是庶人得言之秋也。故人有輕于一葉而言。有重于泰山。蓋天下不治。治之在本。福基禍胎。非偶然者。亡羊而補牢。勝于坐視也。見兔而顧犬。猶爲得策也。歷數前後亂吾邦家者。大概皆默舌之相也。譬如蛇虺蝗蜮。遺類餘種。必爲巨害。仲尼作春秋。吳越未嘗稱人。荆舒咸在斥罰。今奈何不循覆車之戒。用閩蜚爲相乎。前此維揚禍變。一薛居州。齊言不勝楚人之咻。一屈原。獨醒未解衆人之醉。忠言至計。蔽于悍夫之當軸。剛狠怙權之所致。閣下正坐憂人之憂耳。事之不如尊意者。十常八九。可想見也。甚矣世俗之難悟也。伏念藝祖太宗。聰明神武。知人安民。法制規模。防慮宏遠。士大夫孰不由之。不幸默舌之徒。崇飾穿鑿。唱其姦言。鄙堯陋禹。變蔑舊章。掃地無餘。四五十年來。人人風靡其說。淪于骨髓。綱紀頽圯。中原大亂。中才之流。甘心入于商鞅。李斯之術。天下滔滔。不知何者爲正論。所幸慶歷嘉祐之遺。世臣故家。尙有佩服義方之訓。不流俗尙者。稱堯言而希顏徒。其